


# **al-Masīh kī Naī Birādārī**



*al-masīh kī naī birādarī*

The New Community of al-Masih

by Bakhtullah

*[Ao, Khud Dekh Lo 26]*

(Urdu—Roman script)

© 2024 [www.chashmamedia.org](http://www.chashmamedia.org)

*published and printed by*

Good Word, New Delhi

The title cover is derived from BillyTheCat  
<https://pixabay.com/vectors/mughal-scene-scenery-india-4676668/>.

Bible quotations are from UGV.

*for enquiries or to request more copies:*

[askandanswer786@gmail.com](mailto:askandanswer786@gmail.com)

## **Fahrist**

<b>Naī Birādarī kī Shān Pāo</b>	<b>2</b>
<b>Naī Birādarī ke Nae Hukm par Chalo</b>	<b>5</b>
<b>Naī Birādarī kī Ṭhos Buniyād par Khaṛe Raho</b>	<b>6</b>
<b>Injīl, Yūhannā 13:31-38</b>	<b>8</b>

Ek shām Īsā Masīh ne dastarḳhān se uṭhkar apne shāgirdoñ ke pāñw dho die.

► *Is se wuh hamen kyā sikhānā chāhtā thā?*

Yih ki tum sab ko merī ḳhidmat kī zarūrat hai—pāk-sāf karne kī ḳhidmat. Merā shāgird banane kī bas ek hī shart hai—yih ki tum merī yih ḳhidmat qabūl karo. Yih na socho ki tum apnī koshishoñ se pāk-sāf ho sakte ho. Merī ḳhidmat qabūl karo. Tab hī tum shaitānī tāqatoñ se mahfūz rahoge. Tab hī tum adālat ke din bach jāoge. Tab hī tum ḳhud bhī yih ḳhidmat karnā sīkh jāoge. Kyonki ek dūsre kī ḳhidmat mere ghar wāloñ kā lāsānī nishān hai.

Ek thā jo Masīh kī yih ḳhidmat qabūl karne ke lie taiyār nahīn thā—Yahūdāh. Natīje meñ uskā dil andherā ho gayā aur wuh Iblīs ke qabze meñ ā

gayā. Tab wuh chalā gayā tāki Masīh ko dushman ke hawāle kare.

Ab Masīh ne ek nayā mazmūn chherā.

► *Kaun-sā mazmūn?*

Yih ki merī maut aur jī uṭhne se ek nayā zamānā shurū hogā. Ek naī birādarī qāym ho jāegī. Is meñ tīn bāteñ ahm haiñ. Pahlī bāt,

### **Naī Birādarī kī Shān Pāo**

Īsā Masīh ne farmāyā,

Ab Ibn-e-Ādam ne jalāl pāyā aur Allāh ne us meñ jalāl pāyā hai.

(Yūhannā 13:31)

► *Ibn-e-Ādam kaun hai?*

Ibn-e-Ādam Īsā Masīh hai jis ke bāre meñ Dāniyāl nabī ne sadiyon pahle royā dekhkar farmāyā thā ki

Āsmān ke bādaloñ ke sāth sāth koī ā rahā hai jo Ibn-e-Ādam-sā lag rahā hai.

Jab Qadīmul-aiyām ke qarīb pahuñchā

to us ke huzūr lāyā gayā. Use saltanat, izzat aur bādshāhī dī gaī, aur har qaum, ummat aur zabān ke afrād ne uskī parastish kī. Uskī hukūmat abadī hai aur kabhī khatm nahīn hogī. Uskī bādshāhī kabhī tabāh nahīn hogī. (Dāniyāl 7:13-14)

► *Qadīmul-aiyām kaun hai?*

Ḳhudā jis ke sāmne Ibn-e-Ādam ko lāyā gayā. Yānī Īsā Masīh apnī jān dene ke bād jī uṭhā aur dubārā Ḳhudā Bāp ke huzūr āyā.

► *Kis ne jalāl pāyā?*

Īsā Masīh aur Ḳhudā Bāp donoñ ne jalāl pāyā.

► *Īsā Masīh ne kis tarah jalāl pāyā?*

Apnī jān hamārī khatir dekar jī uṭhne se.

► *Ḳhudā Bāp ko kis tarah jalāl mil gayā?*

Us ne azl se apne Farzand ko is duniyā meñ bhejne kā mansūbā banāyā thā. Sab kuchh us ke mansūbe ke taht huā thā. Yoñ use apne Farzand meñ jalāl mil gayā.

Yih kitnā azīm mansūbā thā! Uskā Farzand apnī shān-o-shaukat chhoṛkar is duniyā meñ utar āyā tāki nāqis insān kī ḳhātir apnī jān de. Yih kaisī gahrī muhabbat thī! Us ne hameñ bachāyā, ham jo is lāyq nahīn the.

Yūhannā kī pūrī Injīl isī par zor detī hai: ki Ḳhudā Bāp ne apne Farzand ke wasīle se aisā kām kiyā jo insān kī ām soch se kahīn dūr hai. Insān apne āpko baṛā banānā chāhtā hai. Is ke baraks Ḳhudā ke Farzand ne āsmānī jalāl se utarkar apne āpko past kar diyā aur maut tak tābe rahā. Isī se us ne jalāl pāyā.

Insān ko zyādātar apnī hī fikr rahtī hai. Uskī muhabbat kā dāyṛā bahut mahdūd rahtī hai. Ḳhudā farq hai. Use ham sab kī fikr rahtī hai. Wuh nahīn chāhtā thā ki ham sab jannat kī ḳhushiyon se mahrūm rah jāeñ. Islie us ne apne Farzand ke wasīle se hameñ gunāh aur maut ke panje se chhuṛāyā. Uskī is gahrī muhabbat se uskā lāsānī jalāl zāhir hotā hai.

Lekin ab dhyān deñ. Pas-e-pardā Īsā Masīh ek aur bāt bhī apne shāgirdoñ ko batānā chāhtā thā. Yih ki jo mujh par īmān lāe wuh bhī mere is jalāl meñ sharīk ho jāegā.

► *Īmāndār kyon is jalāl meñ sharīk ho jāegā?*

Jo us par īmān lātā hai wuh uskā ghar wālā ban jātā hai. Is se wuh us ke jalāl meñ bhī sharīk ho jātā hai.

► *Kyā āpko yih shān hāsīl huī hai jo us ke ghar wāloñ ko hāsīl hotī hai?*

Dūsri bāt,

### **Naī Birādari ke Nae Hukm par Chalo**

Īsā Masīh ne apne shāgirdoñ ko batāyā ki thoṛī der bād main chālā jāūngā. Aur jahāñ main jā rahā hūñ wahāñ tum nahīñ ā sakte.

Main tum ko ek nayā hukm detā hūñ, yih ki ek dūsre se muhabbat rakho. Jis tarah mainne tum se muhabbat rakhī usī tarah tum bhī ek dūsre se muhabbat karo. Agar tum ek dūsre se



muhabbat rakhoge to sab jān lenge ki  
tum mere shāgird ho.

(Yūhannā 13:34-35)

► *Ek dūsre se muhabbat rakhnā nayā hukm nahīn thā. Kyā Ḳhudā ne pahle se Isrāīliyon ko nahīn batāyā thā ki ek dūsre se muhabbat rakho?*

Zarūr (dekhie Tauret, Anbiyā 19:18).

► *To phir ise kyon nayā hukm kahā jātā hai?*

Apnī salībī maut se Īsā Masīh ne ek nāī birādārī kī buniyād ḍālī. Is birādārī kā nishān wuh muhabbat hai jo us ne ḳhud duniyā meñ utarkar insān ke wāste apnī jān dene se dikhāī.

► *Kyā āp is hukm par chalte hain?*

Tisrī bāt,

## **Naī Birādārī kī Ṭhos Buniyād par Khare**

### **Raho**

Ab dhyān den ki Patras ne Īsā Masīh kī bāt par kyā kahā. Us ne pūchhā, “Ḳhudāwand, āp kahān jā rahe hain?”

► *Yih sawāl kuchh ajīb-sā lagtā hai. Kyon?*

Abhī abhī Īsā Masīh ne apne shāgirdon ko muhabbat kā nayā hukm diyā thā, lekin Patras ne is par ḡhaur hī na kiyā. Use bas is kī fikr thī ki ustād kahīn jā rahā hai.

► *Wuh yih kyon jānanā chāhtā thā?*

Patras ab tak apne āpko Masīh kā agent samajhtā thā. Uskā wazīr jo sab kuchh control karnā chāhtā thā.

Īsā Masīh ne jawāb diyā, “Jahān main jā rahā hūn wahān tū mere pīchhe nahīn ā saktā. Lekin bād meñ tū mere pīchhe ā jāegā.”

Patras ne sawāl kiyā, “Ḳhudāwand, main āpke pīchhe abhī kyon nahīn jā saktā? Main āpke lie apnī jān tak dene ko taiyār hūn.”

Lekin Īsā Masīh ne jawāb diyā, “Tū mere lie apnī jān denā chāhtā hai? Main tujhe sach batātā hūn ki murḡh ke bāng dene se pahle pahle tū tīn martabā mujhe jānane se inkār kar chukā hogā.”

Patras ko pūrā yaqīn thā ki wuh apnī jān dene ko taiyār thā. Lekin Īsā Masīh kā jawāb sāf hai: Tū

mere lie kuchh nahīn kar saktā. Terī koshisheñ nākāfī haiñ.

► *Wuh kyon̄ nākāfī haiñ?*

Ham apnī taraf se kuchh nahīn kar sakte. Na ham apnī koshishoñ se jannat meñ dākḥil ho sakte haiñ, na sawāb kamā sakte haiñ. Masīh to jannat meñ dākḥil hone kā wāhid wasīlā hai, kyon̄ki us ne apnī salībī maut se hameñ chhuṭkārā diyā hai.

Yahī naī birādarī kī mazbūt buniyād hai. Agar hamārī nāqis koshisheñ is birādarī kī buniyād hotīñ to yih buniyād nāqis hotī. Lekin naī birādarī kī buniyād najāt kā wuh kām hai jo us ne hamārī ḳhātir kiyā hai.

Kyā āpko Masīh kī naī birādarī kī shān hāsil hai?  
Kyā is birādarī kā nayā hukm āpko ubhār rahā hai?  
Kyā āpkī zindagī aur mustaqbil isī birādarī kī ṭhos buniyād par qāym hai?

## **Injil, Yūhannā 13:31-38**

Yahūdāh ke chale jāne ke bād Īsā ne kahā, “Ab Ibn-e-Ādam ne jalāl pāyā aur Allāh ne us meñ jalāl pāyā hai. Hāñ, chūñki Allāh ko us meñ jalāl mil gayā hai islie Allāh apne meñ Farzand ko jalāl degā. Aur wuh yih jalāl fauran degā. Mere bachcho, main̄ thoṛī der aur tumhāre pās ṭhahrūngā. Tum mujhe talāsh karoge, aur jo kuchh main̄ Yahūdiyōñ ko batā chukā hūñ wuh ab tum ko bhī batātā hūñ, jahāñ main̄ jā rahā hūñ wahāñ tum nahīñ ā sakte. Main̄ tum ko ek nayā hukm detā hūñ, yih ki ek dūsre se muhabbat rakho. Jis tarah main̄ne tum se muhabbat rakhī usī tarah tum bhī ek dūsre se muhabbat karo. Agar tum ek dūsre se muhabbat rakhoge to sab jān leñge ki tum mere shāgird ho.”

Patras ne pūchhā, “Ḳhudāwand, āp kahāñ jā rahe haiñ?”

Īsā ne jawāb diyā, “Jahān main jā rahā hūn wahān tū mere pīchhe nahīn ā saktā. Lekin bād meñ tū mere pīchhe ā jāegā.”

Patras ne sawāl kiyā, “Ḳhudāwand, main āpke pīchhe abhī kyon nahīn jā saktā? Main āpke lie apnī jān tak dene ko taiyār hūn.”

Lekin Īsā ne jawāb diyā, “Tū mere lie apnī jān denā chāhtā hai? Main tujhe sach batātā hūn ki murgh ke bāng dene se pahle pahle tū tīn martabā mujhe jānane se inkār kar chukā hogā.